



Ella halla polivalenta da Rueun han 56 equipas giugau per il tetel dil campiuon grischun.

FOTOS A. CADONAU



La giuventetgna ei presenta al Campiunadi grischun da troccas en cumpleina concentrasiun.

# Piars il vegl, la femna ed il giug

Campiunadi grischun da troccas a Rueun

DAD ANDREAS CADONAU / FMR

■ **Al Campiunadi grischun da troccas a Rueun, la fin dall'jamna vargada, ei 56 equipas semesiradas cun spadas, bastuns, rosas e cuppas per bia buns e meins schliats e per il tetel da campiuoness ni campiuon grischun.** Dar ni buca dar, ei magari la damonda, dar suto ni riscar. Piarder il vegl fa mal, per regla aunc pli fetg sch'ins piarda el da cumionza cun il buob. La loscha figura dil retg da spadas, quel da bastuns, dallas rosas ni cuppas, vegn ella tradiziun indigena en munconza da retgs numnaus il vegl. Piarder la femna ei naturalmein era buca fetg d'engrau e lu il ritter, lez va pli tgunsch ellas caglias. Ton mal sco ei fa da piarder il vegl ei la satisfaziun gronda da puder tier el. Troccas secapescha, al Campiunadi grischun sonda e dumengia var-

gada en halla polivalenta a Rueun. La menadra dil giug, *Annalisa Cathomas*, ha astgau beneventar 116 participontas e participonts, 58 gruppas. Il diember da giugaduras e giugadurs ei staus ella rama dils onns vargai. E la menadra dil giug ha presentau avon l'emprema runda empau statistica. Buca meins che 19 dils participonts han frequentau tut ils 14 campiuonadis grischuns da troccas ed ein stai presents a Rueun al 15avel campiuonadi. Fer-ton che 12 giugaduras ni giugadurs ein stai per l'emprema ga dalla partida. 19 pertschien dils participonts ein stai sut 40 onns e la cumpart dallas dunnas ha contonschiu 31 pertschien. Ed il num Campiunadi grischun ha il turnier da troccas senz'autoer meritau. Ina quarta da giugaduras e giugadurs presents a Rueun ei vegnida d'ordvart dalla Surselva. Denter ils pli frequents dil campiuonadi sesan-

flan secapescha entginas corifeas dil giug da troccas ch'ha gudignau il turnier, ni segir terminau el davontier ella rangaziun. Ina certa tensiun e tempru ein secapescha stadas avon maun la sonda avon la partenza dil turnier. Segiramein era tier ils novizs presents ella halla a Rueun.

### Cletg e meins cletg

*Anian Camathias* da Sagogn ei cun 17 onns pli probabel staus il pli giuven ella runda. El ha giugau da cumionza cun siu bab Claudio. Gia per la secunda ga ein els stai presents al Campiunadi grischun. Il facit dalla sonda vargada, miserablas hartas e per consequenza ha ei giu num da dar adia alla concurrenza gia la sonda sera. *Claudio Camathias* ha explicau che la concentrasiun tschessi sch'il cletg dil giug pari dad esser s'absentaus e

quei augmenti buca las atgnas habilitads da giugar. Aschia ch'ins seigi la finfinala buca frustra da terminar il campiuonadi suenter igl emprem gi da giug. Ils Camathias ein buca stai ils sulets, ina quarta dils participonts, en quei cass 14 equipas, han buca contonschiu la runda finala dalla dumengia.

### La rangaziun suonda damaun

Damai ch'il giug final dil 15avel Campiunadi da troccas ei succedius dumengia sera suenter la fin da redacziun vegnan ils victurs e la rangaziun dil campiuonadi publicai ella gasetta da margis.



Attenziun, la trocca damogna ed il vegl da rosas ei futsch.

# Promover art en Surselva

Ella Cularta a Laax ei vegniu formulau strategias per la lavur artistica ella regiun

■ **(fmr/ac) L'invitaziun dalla curatura Yvonne Gienal ha cattau in bien resun. In tschuat persunas fatschentadas cun lavur artistica han discutau la sonda vargada ella Cularta a Laax novas fuormas da collaborar.** Persunas derivontas dalla Bassa cun sedia en Surselva ed indigens ein seradunai la sonda vargada ella Cularta a Laax. Ellas ein suandadas in invit dalla curatura e menadra dalla Cularta *Yvonne Gienal* per formular ideas d'extender las activitads sin palancau cultural ed eventualmein instradar ina collaboraziun vicendeivla. Atgnamein ha la curatura dalla Cularta giu igl intent da sulet envidar ad ina runda libra da discussiun. En consequenza digl interess demussaus viers la scuntrada eis ella tuttina sedecidida da tgamunar la discussiun cun entgins cavazzins mess ella discussiun da sia vart.

Gest la presenza da representanza indigena sco dalla Bassa ha dau triev all'idea da nezegiar las enconuschientschas ed ils contacts. Per possibilizar d'exponer ovras davart dad artistas ed artists indigens ella Bassa sco da render attent la derivonza dalla Bassa allas pussevildads d'exposi-



La Canarta dalla sonda vargada ha purschiu dabia spazi da discutir, per exempel denter igl artist e musicist Luis Coray e la curatura Yvonne Gienal.

FOTO A. CADONAU

ziun en Surselva e metter fil en guila. Pli-navon ei vegniu discutau las pussevildads dad extender la preschientscha digl art indigen el spazi public.

### Basa per discussiuns futuras

Menziun han las diversas casas da scola vitas cattau, e per exempel la perschun da Cuera, il Sennhof che vegn proximamein vits. In tema ei medemamein stada l'inspiraziun vicendeivla che duei vegnir promovida cun in'egliada sur la schuiala ad artistas ed artists. E secapescha la necessitad da filar ina pli stretgareit da contact enteifer artistas ed artists.

Gienal ha accentuau da buca vuler tgamunar las ideas stipuladas ella runda da discussiun dalla sonda vargada. Ella vul sulet porscher via la Cularta da Laax la basa da discussiun ed ei perschuidada che la grupp e las ideas possedian la dinamica necessaria per sesviluppar en ina ni pliras direcziuns.

L'emprema Canarta ella Cularta a Laax para, davart digl interess e las discussiuns dalla sonda vargada, buc ad esser stada la davosa.